

Message Five

Pathen Kah Muisam Oen Kaawnla Ka Awm Khrih

Teeham Caciim; 2Kor. 4:4,7, Kor.1:15, Heb.1:3, Joh.1:18

I. 2Kor.4:4-7 dawngah mami lawng Khrih te Pathen kah muisam oen kaawn la n'huh taawng tih n'awm ngaih thai tila a tuengsak.

- A. Pathen kah a muisam he mami kah dauben tuengna la Khrih te a thui nuet tih, phutlou kaawn tetah mami kah khuibenah aka thuum thaihu la Khrih te a thui nuetna la awm.
- B. Mami lawng dauben Pathen kah muisam la Khrih te n'khuen hamla awm tih, khuiben phutlou kaawn la Khrih te n'dang hamla awm.
- C. Mami lawng Khrih te bawilen toe oen betoet toela n'awm ngaihna khuila kuun hamla awm.
- D. Heb.1:3 dawngah Khrih he Pathen bawilenna kah aka ang angna la awm, tetah Bawipa he Pathen kah muisam tuengna la awm.
- E. Pathen kah muisam la Khrih he Pathen kah hoena oen tuengsakna la awm. Bawipa lawng Pathen te a hoe tih, a tuengsak la awm – Joh.1:18.
- F. Kor.1:15 dawngah Khrih he “mik oen huh thaila ka awm nawh Pathen kah muisam” tila a thui. He huen kah aka awm muisam hetah dauben mik huh muisam nawh tih, Bawipa kah a cooengnathli oen a theennathli boeih dawngah Pathen cooengna kah tuengna la ni a awm.
- G. Mami kah mingna he mami lawng Khrih te Pathen kah muisam angla a ciim cala n'huh hil toe thawlengsak hamla angoe – Rom.12:2.

II. 2Kor.4:4 dawngah Paul lawng “Pathen muithlip la aka awm, Khrih bawilenna awlthang theen kah angna” tila a thui.

- A. Hekah athaan dawngah Paul lawng tahe dung kah pathen, he diklai kah ukkung (Joh.12:31, 14:30, 16:11, Efe.2:2) lawngah aka oeng nawhthli kah poekna thinkaw mik te a pumsak tila mami teng a van thui.
 - 1. Tahe dung kah pathen he tihin mik huh dung ka ukkung, tihin diklai te aka ukkung seitan la awm tih, thlaanghing kah mingna oen poeknathli te a pumsakna rangoen tethli lawng a bawkna hamla a zaawm- 2Kor. 4:4.
 - 2. Tihin thlaangthli boeih nuham paham kah singzoe aka pawm huenthli, awm saangnathli boeih he tahe dung kah pathen lawng a mik a pumsakna la awm.
 - 3. Mami lawng “Bawipa, tahe dung kah pathen te ka taana thai hamla Bawipa nang he kan uepna. Bawipa nang mueh la kailawng a u khaw seh , a meang thaihu khaw seh ka bawk nawh” tila thangthui hamla angoe.
 - 4. Heang a lawngim dawngah n'thangthui kawi nih Pathen benkah angna te va ang vetih, mami tah awngpena te n'dang u ai.
 - 5. Mami lawng mah kah phoeih khaknathli te hooet tih, Bawipa tengla mami kah lungbui te n'melsak kawi nih (3:16) dahnathli te hooetla awm vetih, tahe dung kah pathen he mami kah cooengna dawng awm roe roe tlaih manawh.
- B. Khrih kah awlthang theen hetah angna thoeng tih aka ang bawilenna kah awlthang theen la awm.
- C. Pathen he mik oen n'huh thai nawh, tede Pathen kah lungna Capa, Khrih he Bawipa kah muisam, Bawipa kah cooengna te tuengna la awm tih, Pathen bawilenna kah angna oen Bawipa cooengna kah tacik deengna la awm – (Heb. 1:3).
- D. Kor.1:15 dawngah aka awm Pathen kah muisam he Pathen kah tuengna oen Pathen kah betoet soepbirna te a thui nuet tih, tetah Khrih Bawipa amah roela awm.

- E. *Mik oen huh thaila ka awm nawh Pathen kah muisam* tina hetah Pathen amah roe he mik oen huh thai nawh de, Bawipa kah muisam tetah mik oen n'huh thai tila a thui nuetna la awm – athaan.15.
- F. Mik oen n'huh thai nawh Pathen dawngah n'huh thai a muisam awm tih, tekah a muisam tetah Khrih la awm.
 - 1. Joh. 1:18 dawngah “U lawng Pathen hu vaai nawh de, khat bueng khuehduen la aka awm Pathen, Pa tengah aka awm lawngah ahih te a van tuengsak poen” tila a thui.
 - 2. Pathen te mik oen n'hu thai nawh de Bawipa te aka hing a thlaanghing la ka awm Pathen kah Capa, Jesuh Khrih rangoen tuengsak la awm poen – 3:16.

III. “Hekah kaawn he diklai am dawngah n'khueh u” – 2Kor.4:7a.

- A. Mami dawngah hingna aka pekung Muithla la Khrih he vaang tih bi aka bikung bawila awm. Hehe mami dawngah bueng ni aka awm kaawn la awm.
- B. Mami kah lungbui dawngah Pathen kah angna (athan. 4,6) lawng mami khuila bawilenna kah Khrih la ka awm kaawn te van khuen, Bawipa te mami kah hingna oen soeprep boeih la a awm ham Pathen kah tuengna la awm.
- C. Mami kah lungbui thli dawngah a ang dawngah mami tah kawpoek rai koei, a phu aka awm, ngai hang ham koei kaawn te mami lawng n'dang u.
- D. Lai am la ka awm mami dawngah aka awm Khrih (kaawn) he Khrih thlaang hingna hamla Pathen benkah dawmthleina a kungpui la awm – athaan. 7.
- E. 2Kor. 4:7 dawngah aka awm kaawn tila a tuengsakna he a than 6 te a thui nuet la awm tih, te dawngah Paul lawng Jesuh Khrih kah mik haai kaawng te a thui.
 - 1. Mami kah thinkaw lungbui thli dawngah Pathen kah angna hetah mami lawngah Khrih kah mik haai dawngah Pathen kah bawilenna te n'ming thaina ham mami te angna peek hamla ni.
 - 2. Jesuh Khrih kah mik haai dawngah aka tueng Pathen kah bawilenna he bawilenna kah Pathen he Jesuh Khrih dawng kalawngah patoeng a tuengna la awm. Bawipa te mingthimna hetah bawilenna kah Pathen te mingthimna la awm – athaan.6.
 - 3. Grik awllung dawngah tah 2Kor.4:6 dawngah aka awm *mik haai* he 2:10 dawng kah “a thlaanghing” tila a kawng awllung oen vai hih tih, miklung kah a tengvai te a thui ngaihna tih, a thlaanghing cooengnathli boeih te tuengsak la ka awm khuiben kah poeknathli, ngaihnathli oenah aka be herh herh buehna te a thui nuetna la awm.
 - 4. Hetah mami lawng Khrih kah mik haai mangna te n'dang nawh kawi nih Bawipa te mami tengla a soengna dawngah kaawn la cooeng thai nawh mue.
 - a. Mami lawng Jesuh kah mik haai te n'huh thlaan rooek mami kah khuiah kaawn awm tila mingthimna awm thai nawh mue.
 - b. Khatben ah mami boeih lai am la n'awm tina oen Khrih he mami kah khuiah kaawn la awm tila n'paangpui u thai.
 - c. Atloe khatben ah mami tah Khrih dawngah n'hingna, Bawipa cooengna kah mangna la te buehna a awm deng vengah ni Bawipa he mami ham kaawn la awm tite n'mingthim u huen ai – athaan. 10.
- F. Bawipa kah kamthlahna a soepbirna dawngah Pathen cooengna cadoelhthli dawngah lamha cuek cadoelh tah amah roe te hingna la a kuun ham lai amthli la thlaanghing te a suen ham a ni – Gen.2:7.
 - 1. Pathen lawngah mami n'tuekna hetah mami te thumkhat Pathen rangoen n'beesak tih ruerp awmla ka awm sang koei thaihu la n'cooengsak la ni – Rom.9:21,23, 2Kor.13:14.
 - 2. Awl khueh thai lawngah Pathen lawng sang ham koei la ka awm oengcathli nala Bawipa te lungna ham oen Bawipa tengla awng pe hamla a ngaihna awm tila a tuengsak – Rom. 9:21, 23, 2Kor.3:16.

3. Mami cooengna kah a huepthli dawngah mami lawng Pathen hamla n'awng pe nawh kawinih Bawipa lawng amah oen amah te mami kah khuila rekraa u nawh vetih, mami kah lungbui dawngah imsa thai nawh mue – 1Kor.2:10.
 4. Aka awng u sang ham koei thaihu lawngah tah tukhaw a sai mueh la, amah oen amah te awng u vetih Pathenben thumkhat Pathen kah rekraana te doudoek hamla ni a awm – 2Kor.13:14.
 5. Bawipa lawng mami hamla vanthloen vengah Bawipa lawng mami hamla soeprep boeih te van sai – Efe.3:19.
- G. Mami tah thaa n'zawl u. Tu dawngah tiatah lai thaihuthli la n'awm u dawngah ni. Tede sang ham koei thaihu la ka awm, mami kah khuiah aka awm kaawn lawngah Bawipa tengla mah oen mah awngsak hamla a cooengsak thai tih, Bawipa lawng a sai ham a ngaih thaihuthli boeih a sai ham nawl a khueh thli boeih te Bawipa tengla a peek. Hetah aka tuueng, aka soeng Khrih thlaang hingna la awm – athaan. 17, Gal.2:20.

IV. “He anghthli boeih taa thaina tharaana he kamami kah nawh tih Pathen teng kah ni” 2Kor.4:7b.

- A. Mami tah lai thaihu la n'awm u dawngah thaihuthli boeih taana tharaana he Pathen kah la awm tih, mami kah moenih tite a tuengsak.
 1. Mah oen mah dawngah mami he lai thaihu mueh la a tloe tu khaw tu moenih. Mami tah thawlhna oen n'be tih, n'tlaa u tih n'heem u.
 2. Tetih angla mami dawngah awltak te tuengsak ham oen awlthang theen kah bawilenna te tuengsak hamla tharaana n'khueh u nawh – athaan.4 .
- B. Mami he a phu aka awm nawh lai thaihu la n'awm u de catah, Pathen lawng mami kah khuila phutlou kaawn te van angsak poen.
 1. Tahe ah tekah kaawn tetah mami te tharaana aka pe, tharaana kah a kungpui la awm tih, Pathen kah bawilenna te angsak ham oen awltak te tuengsak hamla mami te tharaana n'peek poen – athaan. 7.
 2. Hekah kaawn he tharaana awm tih, te tharaana tetah sang tare la awm.
- C. Daubenah mami tah lai thaihu la n'awm u, tede khuiben ah mami tah a phu thuilek thai nawh kaawn – soeprep boeih aka thuum hingna aka pekung Muithla la a cooeng hamla patoeng patoeng aka poeng tih thumkhat Pathen kah muitueng la ka awm Khrih – te awm. 1Kor. 15:45b.
- D. Mami kah khuiah kawpoek rai koei kaawn la Khrih he awm. Khuiben ah mami he Pathen kah muisam, thumkhat Pathen kah tuengna la Khrih te n'khueh khak u – 2Kor. 4:4.
- E. Mami lawng Bawipa Jesuh te n'tangna u vengah mami lawng tlangkung bueng te n'dang u moenih, telakah pueh. Mami lawng vaan khawhieh dawngah aka sang tih aka theen koek bawi te n'dang u.
- F. Mami lawng khuiben ah kaawn oen a dauben ah muisam la Khrih te huh taawngna oen awmngaihna awm hamla a ngoe.